

臨

榆

縣

志

卷卷
六五

臨榆縣志卷之五

輿地編一

星野

疆界

形勝

山水上

星野

附經緯線

箕尾燕之分野此定論矣至詳測度數嘗考帝王世紀周天百七萬九千餘里徑三十五萬六千九百七十餘里分爲十二次次三十餘度度得里二千九百三十有二惟天穹而地弦天大而地小不可以天之中準地然約略推之一州一邑不足當其一度謹詳加引證錄其切於本地者以爲考鏡之資此舊志也自新學發明測量家不用星野而用經緯線今並采之以備參觀焉

周禮注析木燕也

周禮總義析木燕之分星幽州之星土也

春秋昭公八年左傳注箕斗之間有天漢故謂之析木之津

春秋元命苞箕星散爲幽州分爲燕國

春秋說題辭箕尾爲燕

爾雅注箕龍尾爾雅疏尾箕在蒼龍之末故曰龍尾

史記天官書尾箕幽州又曰東宮尾爲九子

漢書地理志燕地箕尾分野東爲漁陽右北平遼西遼東西有上谷代郡雁門南得涿郡之易容城范陽北新城故安涿縣良鄉新昌及渤海之安次皆燕分也樂浪元菟亦宜屬焉自尾四度至斗六度謂之析木之次燕之分也

晉書天文志自尾十度至南斗十一度爲析木於辰在寅燕之分野屬幽州又右北平入尾七度西河上郡北地遼西東入尾十度

隋書地理志自尾十度至南斗十一度爲析木屬幽州

唐書天文志析木爲雲漢末派山海極焉故其分野自北河末派窮北極之曲東北負海爲析木負海者以其雲漢之陰也又尾箕析木津也初尾七度終南斗八度自渤海九河之北得漢河間涿郡廣陽及上谷漁陽右北平遼西遼東樂浪元菟古北燕孤竹無終之國尾得雲漢之末派龜魚麗焉當九河

之下流濱於渤碣皆北紀之所窮也箕與南斗相近爲遼水之陽盡朝鮮三韓之地在吳越東南又天寶九載八月五星聚於箕尾熒惑先至而又先去尾箕燕分也

唐書地理志瀛莫幽易涿平嬌檀薊營安東爲析木津分

宋史天文志尾宿九星按漢永元銅儀尾宿十八度唐開元游儀同舊去極百二十度一云百四十度今百二十四度景祐測驗亦十八度距西行從西第二星去極百二十八度在赤道外二十二度乾象新書二十七度箕宿四星按漢永元銅儀箕宿十度唐開元游儀十一度舊去極百十八度今百二十度景祐測驗箕四星十度距西北第一星去極百二十三度

元史曆志周天列宿度用管窺今制渾儀測用二線所測度數分秒與前代不同尾十九度一十分箕十度四十分

帝王世紀自尾十度至斗七度百三十五分而終曰析木之次辰在寅謂之攝提格於律爲應鍾斗建在亥今燕分野

明統志永平府延慶州保安州萬全都指揮使司天文尾分野

一統志永平府禹貢冀州之域尾分野

文獻通考尾九星去極一百二十七度半箕四星去極一百二十一度

山堂考索尾箕星曰析木宮曰人馬時曰寅州曰幽

協紀辨方房心尾箕四宿界卯寅二宮共占三十八度

古今律曆考尾漢太初歷洛下閎所測十八度宋皇祐所測十九度崇寧所測十九度少元授時歷郭守敬所測十九度十分箕太初歷十一度皇祐所測十度元豐所測十一度崇寧所測十度半授時歷所測十度四十分

鄭漁仲通志尾十九度箕十一度

樂軒集星度分野十二次東西南北相及者四疑似者七所可據者其惟析木平其宿尾亦良之維燕可以言東北也

太平寰宇記幽州星分尾箕涿州星分尾宿十六度薊州星分尾三度霸州星分箕尾燕州星分尾斗

清類天文分野之書宛平大興良鄉尾一度通州三河武清尾二度昌平順義
密雲懷柔尾三度涿州房山霸州文安尾四度豐潤玉田薊州保定尾五度
遵化平谷尾七度

此係日下舊聞所載故不及永平

步天歌尾九星如鉤蒼龍尾下頭五點號龜星尾上天江四橫是尾東一箇名
傳說傳說東邊一魚子尾西一室是神宮所以列在后妃中箕四星形狀似
簸箕箕下三星名木杵箕前一星是糠皮

按晉書天文志云右北平入尾七度西上郡北地遼西東入尾十度據陳卓
范蠡鬼谷先生張良譙周京房張衡並云尾箕幽州涼州入箕中十度上谷
入尾一度漁陽入尾三度涿郡入尾十六度渤海入箕一度樂浪入箕三度
元菟入箕六度廣陽入箕九度合參之山海分野可以見矣

以上舊志

民國十七年按經緯線算以北京爲零度測量本縣方位東起東經線三度零
五十秒西極東經線二度三十九分二十九秒南起北緯線三十九度五十
分北極北緯線四十度四十分十秒全境東西橫距二十一分二十一秒南

北縱距五十分十秒縣城居東經二度五十分北緯三十九度五十八分三十秒

以上星野

疆界

夫仁政必自經界始是雖百里之雷封亦不可忽邑自清乾隆改縣後迄今百九十年版圖式廓幅員既長而欲撫治者覃敷聲教慎守郊圻則自西自東自南自北其里數之近遠與夫邊幅之毗連可勿詳志以爲規畫之一助歟

臨榆縣東自關外四道河西至孤石峪廣七十七里南自聯峯山北至羊山嶺袤二百一十里

東至奉天綏中縣界十里奉天省垣八百里

西至深河撫寧縣界六十里京兆區治六百八十里直隸省垣千有十里南至海十里

北至義院口邊八十里自義院口至熱河凌源縣界一百三十里

東南至海十里

西南至戴家河撫寧縣界七十里

東北至凌源縣界七十里

西北至礪礪嶺撫寧縣界七十里

以上疆界

形勝

山海交會隘塞嚴關形勝稱最要焉故歷代據爲邊鎮屯兵扼守刁斗聲相聞居民懍懍慄慄如瀕淵崖地亦巖邑哉今則改爲民國利用火車固守嚴防似無所用然直奉兩戰其勝負之數仍以據有形勝者爲能制其咽喉焉渝關東北循海有大道狹處纔數尺旁皆亂山高峻不可越北至進牛口舊置

八防禦軍募士兵守之

通鑑

燕之渝關吳之西陵蜀之漢樂地有所必據城有所必守

地理通釋

明洪武初卽古會州大寧地設北平行都司興營諸屯衛封建寧藩與遼東宣府東西聯絡爲外邊徐魏國公經略自古北口至山海關增修關隘爲內邊

會典

宏治中薊遼巡撫洪鐘築邊牆自山海抵居庸二百七十餘處隆慶中軍門譚綸請築敵臺三千自居庸東至山海

山海關在撫甯縣東其北爲山其南爲海實險要之區

一統志

長城之枕護燕薊爲京師屏蔽擁雄關爲遼左咽喉

畿輔通志

峭壁洪濤聳匯南北束若甕牖

永平府志

以上形勝

山水上

舊志於山川已詳備矣惟陵谷之變遷泉流之轉徙百年之中亦間有異同茲據近所攷辨與舊文參錄之以符聞見

角山距城北六里脈自邊外灤河之北迤邐而東至建昌之南爲大橫嶺分支

南下起伏轉折至山海關頓起高峰橫開列障南臨大海長城枕之控畿甸
界遼瀋關城之鎮山也山之最高處爲平山頂平廣可坐數百人有巨石嵯
峨如龍首戴角山下岡嶺皆由東循海西轉環抱縣城所謂拱衛神京者也
上有棲賢寺舊多長松葱蘢蔚壯一邑之觀皆數百年物嘉慶間因差務
採取殆盡歷經滋培仍未復舊茲山之北層巒彌望其後即建昌平泉諸境
矣

明兵部職方黃景夔角山詩愛爾棲霞勝乘秋來寺中山高天氣肅蕭瑟
多淒風崖枯驚落葉露重濕草叢感此四時序代謝何怱怱君看盈虛理
退者在成功智哉張留侯千載名無窮棲霞復棲霞無以官爲家又古寺
亂峯裏嵐光四映碧出城指郊路游賞恣所適俗吏苦紛拏久抱山水癖
躋高力未倦愜願如有獲遠蹈想幽人安得卜一宅徑曲便通樵蕨長柔
可摘白晝鳴林禽寒螿汲泉脈藤蘿縈崖樹颺颺掛石壁信步陟絕巘去
天不盈尺瀕洞觀海氛光景相薄射

明兵部職方馬敷詩夙抱煙霞癖無緣脫鞅掌百慮蕩內機庶事勞外像
忽忽青陽暮遙憶山林賞薄言尋蹊壑所希絕塵網佳氣紛鬱葱寶地開
虛敞泉聲清且幽物色何駘蕩莓苔染階碧松露滴石響舉觴臨東風悠
然任來往長歌故徘徊古洞恣偃仰歸來憩空堂芳樹日初上又人生常
懷憂流光祇虛過逍遙對珠林忘形依石坐烏馱烟霞還猿穿藤蘿破雨
霽覺景幽衣冷耽雲臥不求東海仙近訪西山餓

明永平太守東阿劉隅詩紫塞雙峰接丹梯萬仞緣魂搖山入海目斷水
涵天白石留仙篆青松覆綺筵不辭今日醉潦倒媿高賢

明馬敷詩元雲邈且復飄渺紺園颺登臨一瞻眺上有白玉堂堂中何所
有一人披霓裳借問何所爲誦經餐霞漿夙懷慕眞隱悠悠踰十霜相逢
興不淺談空殊未央山煙橫野碧洞林帶晨光泉水照禪心松月窺石牀
幸茲寡塵慮詎復論圭璋

明聞人詮詩履險眞成癖探奇思不禁禪房高士枕雞黍故人心去國應

千里行囊只一琴杖藜僧舍近鐘磬有餘音

明劉崧詩雲鎖空林寺盤旋石蹬長細泉清滴滴深樹藹蒼蒼海氣侵禪
幄巖陰落酒觴歸來煙市晚猶覺雨花香又絕蠟藤蘿迴涼生五月秋野
心同海鶴塵夢愧沙鷗遠塞重陰蔽平城薄霧收神京何處是縹緲五雲
頭

明關部陳琯詩每日城中見角山入山始覺遠人寰香雲細裊龍宮靜石
蘚斜侵鳥道斑殿閣影從滄海落梵鐘聲度碧空還關門吏隱渾無事猶
羨僧齋盡日閒

明盧龍白尙書瑜詩山靈招隱已多年穿石攀藤肯讓先謾說太行隨地
盡驚看溟海與天連低徊眼界塵凡外笑傲身疑牛斗邊不是恩寬容選
勝當關猶稅買山錢

明薊遼總督梁夢龍詩曾緣國計訪蓬萊勞擾還從碣石回東北兩觀滄
海日幽青一覽角山臺遐荒玉帛風雲護巖邑金湯天地開手握泥丸封

要害武寧經略亦雄哉

明詹尙書榮角山精舍次呂岵野韻百二泥封鎖日閒肩輿乘興到空山
蕭疎野徑蒙攜酒風雪柴門爲啓關絕調豈云齊倡和高情勞憶舊追攀
留君坐對寒宵月木杅頻催未許還

清管關通守永嘉陳天植詩振策最高處危峰接大荒雲歸遼海白沙湧
薊門黃野草匝初地秋風冷戰場不堪重弔古把酒酌斜陽

清邑人張瑞揚詩金碧何年降法狔翠微遙映海雲低旛飛龍鳳虹雙引
燈掛琉璃水一攜東揖蓬瀛還珮玦西瞻袞冕拜輪蹄山頭向晚籠歸轡
萬里長邊襟帶齊

清彭延禩詩已登望海樓更遊角山寺石磴盤山阿迴環閣佳致力倦席
草坐息定還最最精舍忽在眼布置存古意烹茶品名泉俯仰窮天地雲
水何渺茫城市燦若織伊余邱壑性未遂棲隱志徒羨山中僧日看海潮
至

清遷安劉都憲鴻儒重九登角山遇雨詩振腕登高菊正酣翠微深處紉
宮依歲荒山寂遊人少秋老邊寒過雁稀開代戰場眼底闕舊時烽塞嶺
頭巍歡酬莫瑣情何極妬雨催歸恨落暉

清邑人呂參政鳴章和劉都諫韻詩嫋嫋翠微菊弄酣梯雲尋勝步同依
貝叢清映遊絲淨衲榻幽閒俗客稀眼底洪濤晴愈森巒頭密霧雨添巍
會心似有山靈助潦倒莫樽任落暉

清衛守府陳公廷謨登角山憶昔偶作角山幾度展邊籌憑弔長城千萬
秋昨歲鳩工方得濟躊躇猶帶五更愁又角山登眺詩日出渾疑吐海鼉
沙邊春浪湧洪濤倚欄遙向東南望雉堞氤氲百尺高

清府憲奉天陳丹重九登角山詩攬勝登高九日秋茱萸香泛興偏適雙
峰插髻青螺見萬壑亭松翠蓋浮飛將有靈偃蚤遁封姨多事帽難留幾
回徙倚巉巖上海外三山一望收

清邑人劉允元重九登角山陪陳比部詩十年不到角山遊今我來遊重

九秋門下青松欹翠岫路旁紅葉點丹邱新禾釀酒菊花味舊契投歡梅
雪謳攬勝追隨能幾許浮沈滄海任東流

清邑人穆宗道仲夏重遊角山書舍詩曾記當年霧隱時雲封煙鎖任棲
遲孤峰頂上結茅舍萬木叢中養鳳姿去後松濤渾怨我歸來山月欲迎
誰一聲長嘯丹崖震海市何妨貨鬢絲

清邑人李養和詩重到深山訪舊齋芸窗吟榻委塵埃誰能忘却青燈夜
不覺愁生綠蟻杯種樹已隨僧老去落花空逐鳥飛來請看石上題詩處
梅雨淋漓點翠苔又登角山詩青霄萬仞削芙蓉杖策先登第一峰滿徑
草香俱是藥半山松老盡成龍采芝力倦年非壯對酒裁詩興轉濃搔首
幾番尋絕壁舊題多被紫苔封

清儒學李廷對詩憑臨巔頂萬山低高閣深深覺路迷寺隱岩阿惟月到
峯藏老幹許雲棲滄桑日湧銅鉦麗古堞牆高翠嶂齊愛煞清秋將夜半
松聲細細雜猿啼

清管糧通判烏林泰角山大道灣詩郭外山光絢雨晴一峯側立一峯橫
看山妙悟行文訣佳處多從轉處生

清邑人王册登角山詩餘火野林燒山紅半截腰走煙驚雉兔點豆畫漁
樵海色留窗納禽聲仗酒邀乾坤供典則盡數入詩瓢

清邑人蘭士元角山看雲詩遊人笑向山中指雲自空山空處起大壑神
風捲地來白龍飛出深潭裡初看一縷相鉤連蜿蜒欲上蒼崖巔錯疑幽
谷隱村落晨炊煨竈生孤煙忽然蒼蔚侵林麓萬朶芙蓉披素縠排空疑
擁衆仙行作勢不容飛鳥逐須臾漸掩扶桑噉欲雨不雨愁黃昏罩海儼
如吞雲夢馭氣直欲包乾坤有時勢盡忽中斷兩扇匡門捲羅幔錦繡江
山入畫圖下方依舊晴曦爛須臾又引奇峯來滿座浮陰掃不開從前過
眼繁華夢似真似幻生疑猜交煙凝霧迷樓閣隻手拏雲招白鶴溼氣難
憑羽扇揮腥風欲襲羅衣薄此時遠望雲濛濛雲繞身邊色轉空只道眼
前雲百變不知身已在雲中又詠角山詩連山薊門來絡繹盡東向當關

聳雙峯鬬角不肯讓峨峨數千仞終古作保障嵐翠九天落雄城近相傍
遼東左接壤沃野千里曠西瞻碣石山百里勢遙抗長城俯龍首蜿蜒到
海上海與山爭高天水相摩盪村虛水墨圖城郭鳳凰狀茫茫二百秋皇
圖自雄壯朔漠羣峯低起伏似風浪淪水入斷山委折日奔放侵天樵徑
微填壑怪雲颺石門四十里隱約入嵐瘴陰晴有萬變天地周四望自非
登山椒難盡烟霞量伊余性不羈山寺慕高尙朝立飛雲巖暑天尙挾纈
天雞啼一聲海日浴寒漲清夜四山寂危坐釣月舫漁燈認遙浦鬼火出
古壙寒鳴答鈴語山魈和樵唱僧樓疏鐘鳴靜理悟三藏吾鄉富山水茲
山無與况何必五嶽遊高懷始跌宕飲興豈厭豪詩格不嫌創勝游百年
期青山自無恙又角山仙閣落成登眺有作懸崖創雲宮飛宇勢超拔廊
廻抱三面雲氣入囊括拓地古苔薶傍檻新竹活入門得幽趣吟眸歛未
豁開窗納萬象始見天地闊意匠巧莫階佳構恒蹊脫曉踏山雲歸斯愛
苦難割又夜登角山絕頂詩手招一片雲翼我陟崔嵬山風盪疏襟渾疑